



新安大好紀麗序

竒文共賞陶公栗里之詩妙偶天成  
閨之帖晉張華之博物麟角承恩唐賈耽之  
皇華鴻臚備對其有才人花萼學士珠英標  
題則玉采搖山屬草則金聲擲地芳林碧玉  
孟利貞擷秀何多文苑英華蘇易簡成編更  
富浚儀玉海別有紺珠天監雕龍從夸絢采  
夫以名山都水每吾人登覽之資地理方名





尤學士洽聞之助山經荒怪費郭璞之疏尋  
水注淵源賴桑欽之託始圖元和之郡縣九  
譯達於梯航撰興國之紘埏八表同於寰宇  
迺有華陽風俗自成一書太原事迹都為別  
錄幽蘭居士夢紀東京錦里耆英書傳西蜀  
雖復聞人伯紀全書之碑碣半居先哲端良  
小集之文章簡要曾未有屬辭比事妙選妍  
華啓秀編珠全成藻繪訪山川於韋澳有美

必雙狀草木於嵇含無竒不偶麗文麗則託  
劉李之芳名紀歲紀時循宗韓之雅目新安  
大好紀麗者吾先兄汝登先生之所作也夫  
其鄉閭稱孝弱冠窮經時歸顏子之名世重  
康成之業元通微妙易說折乎九師話訓箋  
疏禮學窮於八代紛紜史籍並涉條流等切  
音和創成表記談元餘事楊子雲不廢詞章  
匡謬多勤顏師古尤工是正聲高京輔望滿

儒林若此彘彘第其小小者耳吾郡天分星  
紀地隸丹陽經傳天子之都記載軒轅之蹟  
秦朝梅令尚指封城吳國孫王空尋舊壠靈  
壇香草西京之禡祀眇茫石壁金雞寶誌之  
遊踪髣髴清溪幾道合流郡郭之前峻嶺千  
尋高聳雲霄之際是以新安文獻萃道學之  
鍾靈大好山川得賢侯之卧理者已追維往事  
慨想當年三姜共寢之時二陸同居之日鏗

鏗經席屬有餘閒兀兀書林曾無寧晷是用  
搜竒志乘類對圖經纂杏庭之家言彙篁墩  
之博載條分屬邑盡錦字之雙雙別紀竒峯  
具蓮華之六六至乃析譌漢縣辨正鄆山讐  
舊志之荒唐訂前人之傳會則又崑岡片玉  
可想白虹霧隱一斑亦覘全豹貽諸好事倘  
勝佩觿陳彼輶軒宜蒙采菲弟梧謹序



新安大好紀麗

歙縣洪榜著

歙縣

漢縣

玉帳花屏

府志玉屏山在縣東北明太祖常駐蹕於此故名駐蹕山郡人畢永俊因構屋其麓題曰玉帳遺蹤京兆畢懋康構西清館其上池蓮並蒂又名之曰華萃山祥符圖經問政山唐光化中聶道士隱此刺史陶

雅深所推重常訪以為政之要故名方輿  
勝覽載聶夷中詩云千尋練帶新安水萬  
仞花屏問政山故府志云問政山縣東二  
里一名花屏唐有荆南掌書記于方外者  
棄官從太白山學術時其從弟德晦刺歙  
州方外訪之為築室于號問政山房邑人  
聶師道少事方外後入吳為國師號問政  
先生山有興道觀寶相寺寺側有泉有

政

眉鐘樓二峯事見碑志及豫章黃山谷書  
問政先生誥後其絕崖下列有宋黃台詞  
見後

馬鞍魚袋

近縣東南山見府志 府志距黃羅五里  
有魚袋山在天津山之西禪廬飛閣悉嵌  
壁間有一樹菴飄飄閣楊枝泉金紫院  
白榆黃蘗



近馬鞍山見府志 府志縣北九十里黃  
藥山支發蕩嶺布射之水出焉唐裴休刺  
歙州訪黃藥禪師於此因名  
黃塌烏泥

府志縣東十里塌子山即黃塌嶺斷而再  
起為高眉尖下有阿育王殿一名高峯菴  
府志縣北烏泥嶺由三汊出太平路宋  
蔣果與金人馬吉戰拒守嶺上

篁墩蕩嶺

府志縣西三十里一名篁墩有晉新安太  
守黃積邱墓梁太守程靈洗墓祠 蕩嶺  
縣北八十里黃山之東富資水所出唐越  
國汪公用兵時所開見府志

葛山呂塌

府志在縣西北傳云葛山仙翁浴丹於山  
阿沼中魚食其餘皆為龍又名鯉王山沼

有泉甘宋羅願生時湧出三日其甘如蜜  
府志豐樂水南迤於曹阮溪過仙人臺  
溢於昌塌又溢於呂塌入於練溪  
桑嶺柳亭

府志雙嶺在縣北明太祖破偽漢之師駐  
蹕於此渴而呼泉泉即湧出又名桑嶺  
柳亭府志縣南百里一名昌山昌溪之水  
出焉

雲郎砂子

府志在縣北七里唐越國汪公華葬此有  
祠在焉俗呼為雲郎山砂子府志在縣  
南八十里其頂有砂峯大聖廟下瞰深潭  
有瀑布注潭中歲旱禱雨多應

天馬潛虬

府志距黃羅五里曰天馬山舊上有元武  
宮其西曰金雞峯潛虬府志在巖鎮豐



樂溪環繞山麓舊有蕪葭館娑羅園下有  
潭曰虬石具園林之勝

飛笙文几

府志飛來山在問政山西一名飛笙山相  
傳有鳳飛來生八子於此故山有八子巷  
上有鳳岡精舍處士畢元所棲大學士商  
輅為之題額即秀野莊也其入山小徑有  
為朱文公外祖祝氏舊居祝亦遷崇安文

公自閩歸過之題舊時山月四字即兵馬  
使畢力忠長春園也 府志在縣西一名

鳳山有文几山臺巖鎮塔長橋跨水

碎月披雲

府志碎月灘在興唐寺前按豐樂水與揚  
之水匯入練溪由歛浦出新安江此為第  
一灘因太白遊興唐寺有檻外一條溪幾  
回流碎月之句因名焉 府志縣西南二

里披雲峯在城陽山右上有披雲亭唐宣  
歙副使魏宏簡建張友正記見柳子厚文  
集及文苑英華羅鄂州以為創自宋守蘇  
德祥山麓有歙州司馬呂渭讀書堂峯下  
有梅花古衲墓漸江遷化之日語人墓上  
種梅花曰我願清香萬斛濯魄冰壺也其  
麓即太平興國寺人呼為西峯

厚山嚴嶺

厚山府志縣北三十五里舊名武山天寶  
六年改今名 嚴嶺府志縣北在坑口有  
九公隴明太祖征張士誠踰嶺徐達常遇  
春等九人從焉故名

箕臺漢洞

箕臺府志即箕山園上有悠然閣 漢洞  
府志在仁愛鄉有屯聚爨臼遺跡相傳漢  
時郡人避王莽亂於此



萬紫百花

萬紫府志縣南山一曰鍾洪高數千尋上有池曰天塘有寶誌遺跡北有觀音巖近巖有金雞石壁有赤文綠字俗傳能讀此金雞飛鳴唐羅隱過讀之果驗 府志百花臺縣西三里宋司農少卿何叔詹墓前少卿致政時所築

龜潭龍井

龜潭府志在縣西北六十里 龍井府志山在縣南支發紫陽一名鶴頂山絕練江挾漁梁相傳宣州刺史訪仙處俗所謂訪仙橋也山上有禹廟

潁水漳潭

潁水府志發源海陽劉家山由西而東入豐樂水 漳潭府志在縣南

霞山昱嶺

霞山府志一名蝦山其上有神柱塔縣南  
昱嶺府東南百二十里境接昌化元置  
關明置王干巡司

昉寺王潭

昉寺府志在許村寺側有富資水梁太守  
任昉愛之因名宋元豐中因避守名為立  
任公寺 王潭府志在漸江中馬岩翁上  
有隱園昔人題句云羲之重寫蘭亭序摩

綿水練溪

詰親傳輞水圖皆王山人仲房所遺跡也  
府志佛論嶺下綿溪水東南匯於鳳池入  
於深渡 府志歙縣大川源從績溪龍巖  
山下揚之水至於硃砂崖過周潭會於布  
射富資水又南會於大小母場豐樂三水  
入於練溪是名西溪所謂西河之干在縣  
西府城外興唐諸寺在其南岸下為浣沙



埠經漁梁下抵歙浦合於率水又曰練江亦曰徽溪

楊干松谷

府志深水峯在楊干唐初有僧止此其徒曇選增創為楊干寺峯下有水自黃山來為黃龍源入於深水 府志松谷寺在疊嶂峯下黃山有兩松谷其一在北獅子峯下

銅井麻坑

府志銅井潭一名石壁在縣東北四里揚之水中 麻坑府志在鎮安門外有宋相程元鳳微時事本又名蝦蟇坑

沁珠迸玉

府志沁珠泉在縣北四十里 府志迸玉泉在寶相寺山麓

南源東隴

府志南源古寺在長陔唐太和三年建祀  
梁武帝暨寶誌有古碑存寺寺後五峯前  
有三瀑布匯為澤名鉢孟津有燕石巖朱  
子讀書寺中手書新安大好山水六字鐫  
於石壁 府志東古寺在石耳山東陽亦  
名東陽古寺龍鳳中建

湖田水陸

府志湖田寺在寧仁鄉宋紹興中建 府

志水陸院在寧仁鄉岑山里五代吳順義  
中建

一樹週流

府志一樹菴在魚袋山見前 府志週流  
寺舊在永豐鄉岑山五代吳天祐間徙建  
溪西二里許

主簿砦太守山

府志飛布山在縣北二十里一名主簿山



新安山水志主簿岩在飛布山昔主簿葛顯率州民置兵於此有主簿祠山上有甘露洞其支曰飛岑山左去二里曰駿唐山與此山接太守山府志在縣西十里一名屯邊上有忠烈太守陳彥回祖母郭夫人墓

方吳嶺曹阮溪

府志縣南九十里危峯嶺之東曰方吳嶺

石門之水出焉曹阮溪見前呂場

相公湖少保井

府志篁墩湖一曰蠶湖一曰相公湖太平寰宇記見程靈洗射蠶事少保井府志在縣西一里府城內唐少保蔭稷所鑿

綠水寺紫霞山

府志綠水泉在縣城南綠水寺紫霞山府志在縣西北三十里上有大士巖下有

井曰阮公泉巖下有溪熊伯甘南榮集云  
潛溪為紫桑卜居舊榜淵明故里語近傳  
會又一溪自阮公源出今亦謂阮溪溪側  
有水香園栗亭亭在紫霞山右下臨桃花  
潭多古松老栗舊名四顧房施愚山學士  
顏曰栗亭汪士鋐棲逸焉

鳳凰山鴛鴦井

府志縣北十五里世傳有鳳凰集此舊產

茶宋熙寧中邱寺丞名為甘白香鴛鴦  
井府志在朱方

甘露洞飛雨泉

甘露洞見主簿岩飛雨泉府志從湯寺

遙望山泉高灑有如霖霽凜若深秋

聖僧山仙姥谷

聖僧山府志在縣西唐武德間僧慧明居  
此故名下有泉凝碧曰靈塘左為洗眼池



山巔有石曰仙人幢南渡時有道人鵠亦常居此宋張商英明殷邁俱有記汪司馬道昆增創精藍潘之恒馮太史開之俱題焉 仙姥谷府志在縣西南二里太平寰宇記云城陽山迴環孔高為城郭襟帶唐景雲中許宣平隱山之南隲故別號南山其山夷廣數畝四面墳起如堵亦名翠微峯取宣平穿雲入翠微之句也山樹有穿

雲亭上有鉢孟峯禮斗壇後有天姥峯仙姥谷分桃石豐隆嶺丹地浴仙池諸勝山上有許仙宮循山而上有三十六灣唐建南山道院宋建炎中改今名明萬歷丙申少傅許國重修宮左有少傅祠自題曰辟穀居 錫杖泉鐵帽井 府志金竺山在縣西四十里琴溪之上山

有金竺菴菴前有三生石錫杖泉吳越王  
墓山麓為龍湫崖 鐵帽井府志在黃家  
隲相傳征討師過鐵帽所掘

雪竇泉雲門石

雪竇泉府志在福勝寺 府志落仙潭在

太源湯和應制詩有劈開雲門石之句今

名雲門石

孔靈山汪王港

孔靈山府志在縣南二十五里晉會稽孔  
愉避地居此 府志練溪下注歛浦中有

汪王鐵沙二港

豐樂溪富資水

豐樂溪府志出黃山詳見呂壻 府志蕝  
嶺下富資水南逾於昉溪過任公釣臺入  
於跳石會布射水入於練溪

春草閣古梅窩



春草閣府志在松明山汪司馬南溟讀書處古梅窩府志在向杲宋吳龍翰所居常作古梅賦以自况其自題句有春在梅花紙帳邊之句

半山亭分秀閣

半山亭府志在問政山分秀閣府志在長樂鄉傍溪寺西

松圓閣羅穎樓

松圓閣府志在長翰山程嘉燧孟陽樓逸於此有松曰纓絡枝枝垂地宛若游絲羅穎樓府志新安山水志云樓跨黃樓天馬間樓前小山外見黃羅如錐穎

黃石公洞藺將軍巖

府志縣東萬羅有洞俗傳黃石公洞藺將軍巖府志隋藺亮屯兵處縣南十五里太平興國大中祥符

府志太平興國寺在郡城外練水西舊名興唐唐至德二年建宋太平興國中勅改別院二十有四今存其十曰應夢羅漢院曰五明曰福勝曰經藏曰淨名曰妙法曰如意曰等覺山左曰長慶前曰古塔七級院府志寺在黃山天都峯下唐大中五年刺史李敬方建龍堂於湯池西五代吳天祐二年刺史陶雅建寺號湯院南唐保

大二年改靈泉院宋大中祥符元年勅改今名

三十六灣二十四院

三十六灣許仙宮見仙姥谷二十四院見太平興國



新安大好紀麗

歙縣洪榜著

休寧

三國吳休陽又海陽晉海陽又黎陽隋改名

萬歲千秋

府志古城巖即萬安山一名萬歲山在縣

東十里其東北麓有石門之險隋大業末

汪華築城自黟移郡治於此石門有磨崖

碑宋縣宰鄒補之大隸兌卦於上 府志

千秋潭在縣東二十里潭上有焦石多將

軍石

竹山藍渡

竹山府志在三十三都鵬源汪氏世居其  
下處士汪鳳英因扁為號 府志藍渡橋  
在縣西十五里亦名別駕橋

汶水岐山

汶水府志在縣南五十里其源東自白際  
佩琅南自馬金璜源二水來四十里至此

合流繞岐陽山故名汶水宋隆興中少師  
程秘生有紫雲繞溪經日不散又名紫雲  
溪北流二十里合率口水而黃羅峯障焉  
岐山府志在縣西六十里高二百仞周  
二十三里又名石橋巖石壁千尺懸瀑萬  
仞西北半壁有大石橋亘兩山其旁有深  
澗相傳昔有碧蓮花葉亘尺自澗流出今  
有佛宮名石橋院



龍源鴈蕩

龍源府志趙彌忠建有雲屋省心亭翠侍亭問道亭有有堂多名公題詠府志鴈溪在縣南四十吳氏世居之相傳昔有鴈來此故名鴈蕩又名鴈塘

齊雲落石

府志白嶽山在縣西三十里高三百仞周三十五里遊齊雲者必先登焉由白嶽而

南名為石門有唐刺史韋綬所築精舍齊雲巖高三百五十仞周數十里自白嶽西南五里至桃花嶺重巖夾峙結小屋曰中和亭亭下二巨石蹲伏曰石驚鳩鳩旁曰桃花磴渡磴近西乃有石隙方廣若門曰天門門下舊有石楠一株大數十圍入門東南行聯巖如城其第一彌陀巖今有密多院第二曰觀音巖前一石曰鸚鵡石第

三曰羅漢洞二石龍循洞門旁出鱗骨隱起如真龍第四龍王巖上有飛泉灑落如雨曰珍珠簾簾前有池曰碧蓮池瀦水沸散於西澗曰龍池泉西巘有帑跡曰黑帑嶺西行折南里餘至車硤嶺其峻視白嶽倍之南二里至真武觀觀後一山突起如屏倚天所謂齊雲巖也雲巖二字內翰程秘所題明嘉靖中改名齊雲山勅建太素

宮左峯石鼓右峯石鍾夾屏兩峯曰輦輅觀前水如帶委蛇而東為石橋以度直觀門一峯曰香鑪峯左右西崖之門有巨石特起又謂之凌虛巖橋西高巖中斷一小峯離立巖下曰捨身巖西行上浮雲嶺南下數十步仰視棲霞洞其頂橫卧一石如蟠螭曰鵲橋下有洗藥池左崛起巨巖曰紫霄前一石曰五丁又有比肩立者曰五



老南一石卓立曰天柱別一逕通獨聳巖  
一澗自西北來散而為井者九北三里一  
石洞屏榻整然又北一里五峯並峙而中  
稍高曰五鳳樓上有石人呼之若應西北  
有沉香閣不能往也位殿初創自宋寶慶  
真像相傳百鳥銜泥所塑後兩經火一髮  
不燬汪舜民志云至元中有講師葉元焚  
修於此數年遷於鳳山之良庭其祠正對

香爐峯 落石祥符經云昔有兩舟泊此  
潭一祭一否夜半有神人徙祭者舟於北  
岸有石五丈自絕壁墜碎其一舟其墜處  
今為臺又名落石臺府志舊名斷石山巖  
下斷石成臺宋邑令呂大防題由臺陟雲  
梯而上多琳宮梵刹有員嶠亭無念閣漱  
石軒臺前夾溪滙流明表中郎詩所謂雙  
溪分燕尾是也

白鶴石龍

府志白鶴溪水出黟縣吉陽山一百五十里至斷崖雙溪口與夾溪水合流於夏紋溪富郎潭為請水祈雨之所過古城巖下東南流三十里至屯溪與南港大溪相會

竹洲芝室

府志石龍洞在縣西百餘里石龍山中竹洲府志在上山宋吳文肅公傲建有流

憇亭淨香亭仁壽堂靜觀齋再節菴梅隱菴遐觀亭風雩亭皆自為記又有朝爽亭府志在江潭宋監察御史兼崇政殿說書吳輔所建又有荆山別墅

卧雪玩雲

府志卧雪齋在五城李本立建金彥瑾記府志玩雲樓在汭川程彥章建鮑寧記

萬松山黃竹嶺



萬松山府志在縣北三十里支發岐陽山

黃竹嶺府志在縣北一百六十一里為

張公山西支連饒州浮梁界

李花隴松蘿山

府志白鶴山在城內有李花隴春月如瑤

林有泉名東山泉 松蘿山府志在縣北

十三里與天葆山聯山半石壁百餘仞有

禪菴在焉蜿蜒數里如列屏障於縣治之

後俗呼為金佛山松蘿之茶甲天下然產

不過十餘觔

東密巖南當水

東密巖府志在縣南三十里高六十仞四

面皆平獨此特高東西二小逕緣石磴登

其嶺平行八百餘步乾符中程灃率衆立

寨於此以拒黃巢上有元帥府基下有落

箭邱 府志出南當山東流百五十里

馬金嶺鹿髀山山在縣南五十里府志岐陽山一名旗山在縣南五十里其脉由馬金嶺蜿蜒而來璜原珮琅二水夾流其支為萬公山宋少師程秘墓在焉鹿髀山府志在縣南一百五十里昔有採藥者遇老人鬚眉皓白指靈藥遺之乃鹿髀也回顧不見拂雲亭得月閣

府志宋朱惠州權建有芳洲景星樓濯纓亭拂雲亭皆居休遊樂之所得月閣府志在白鶴溪

翠微寺野色亭

翠微寺府志在四都府志吳伯岡建有安樂窩蠡亭泉聲亭野色亭畧約橋獅子泉呂旭有詩竺梵堂燒香院



竺梵堂府志在縣東 府志萬安寺舊名  
燒香院唐咸通十四年建

新安大好紀麗

歙縣洪榜著

婺源

唐開元中分休寧回玉鄉  
並割番陽懷金鄉置縣

屏障山船槽峽

屏障山府志在縣東九十里自芙蓉峯發  
脉方峙如屏下開平壤曰大畷汪氏世居  
之陰巖山在其左右耳山在其右前有東  
峯相拱揖餘山亦周遭如城鱗水經其前  
因又名鱗溪 船槽峽府志縣西北五十

里邑沿龍脉過峽處山甚奇秀有大小船槽五會脉同過後有石屏左右有日月二山夾峽皆平地山麓有青蘿洞石屏下有二洞俗傳內有洞通鄱陽湖

龍尾雞冠

龍尾府志在縣東一百里芙蓉嶺之支也西連武溪石可作硯一名羅紋山以石有羅紋故蘇軾有龍尾硯歌雞冠府志在

方山斜水  
縣北段莘曰雞冠尖

方山府志在縣城南二里五代時士人朱寬隱此有墨池在山樹後寬仕南唐為銀青光祿大夫上柱其子孫世居山下俗號朱相公尖在山之左諺云方山笑湖水平婺源出公卿斜水府志出斜山南流九十里合婺水入樂平界



瑪瑙瓊瓏

府志瑪瑙峯在縣西北二十里考川東其北為珊瑚峯 府志瓊瓏巖在縣西北有龍湫禱雨即應

雨餘石際

府志雨餘山在縣北桃溪 府志石際山

在縣南二十里又名實際

廬源葵水

廬源府志一名龍川在縣北一百里其水直達鄱湖經廬下故名 葵水府志出大廣山南流八十五里繞縣城又南流四十里合斜水通鄱陽湖

繡水龍泉

繡水府志在縣城北門其紋如繡故名三面繞城而西凡合二港其源十有一出石耳大繡芙蓉者正東之水也合于中平出

龍尾朗山回嶺葱嶺東山者東北之水也  
與正東水總會於汪口又西十餘里閣山  
之水獨入謂之北港出浙源陀川洞靈者  
正北之水也至於清華合流而西謂之西  
港縣北二十里曰武口者又東西港所合  
處也蚌蛇今已築平在縣北門大溪之所  
經也踰縣五里歛溪之水南入又十里福  
陽之水北入又十五里銅川水南入其源

發自黃岡山之陰又二十里而太白水北  
入其源發自張公山又二十里而環溪水  
北入於是合流出境直達鄱陽 府志在  
縣北七十里龍泉寺後有石井俗傳有龍  
潛其旱禱即應唐呂洞賓大書飛龍巖三  
字刻於石

梅源篁嶺

府志梅源山在縣西一百二十里接浮梁



界舊名梅山天寶間加源字山產楊梅梁  
任昉為郡守罷不采 篁嶺府志在縣東  
九十里其地多竹大者逞尺故名  
蓮花山芙蓉嶺

蓮花山府志在縣東百五里接衢州界其  
高極天羣峰如蓮花有龍湫禱雨輒應  
府志在縣東八十五里高幾千餘仞五嶺  
中最高者也其山之冢為芙蓉嶺又名靈

山中有碧雲菴有祖師石亭亭上有石  
筍高二丈山陰有龍湫聖巖又有磨針石  
蓮花石其陽有金雞石半月巖五祖巖諸  
勝跡實南唐國師何令通棲真之所

武溪水浙源山

武溪水府志出浙源山其東為龍尾山南  
流五十里至縣界 浙源山府志一名浙  
嶺在縣北七十里婺源諸水多入鄱陽惟

此山之水東會休寧祁門黟縣諸水至歙  
浦又會歙縣績溪諸水赴浙江其山舊產  
石英鍾乳又有戴公三嶺泥源九灣自縣  
趨郡捷徑也

金鐘巖玉帶水

金鐘巖府志去礫岨寺五里巖瀑注水清  
如玉鏡 玉帶水府志在礫岨山之東四  
時瀑布高數尺注於溪

青苓洞黃荆墩

青苓洞府志在縣西八十里南北門相通  
中有物象如靈巖三洞 黃荆墩府志在  
縣北車田平地特起狀若長虹首尾有飲  
虹二池

查公山韋齋井

查公山府志在縣西宋侍御史查陶故居  
死葬焉元立山房道院據谷口泉上石壁



刻云查公山廖公泉今其字可辨 韋齋  
井府志在縣治南今在文公闕里西迺宋  
韋齋朱松故居松始生日井中白氣松嘗  
為井銘曰道寓斯人如水在地汲之益深  
有味外味後松子熹生時井中紫氣見故  
後人號曰韋齋井又名虹井

扶車嶺穩舟亭

扶車嶺府志在縣東一百二十里休界

穩舟亭府志在縣東濟溪元武夷御茶局  
副使游楫隱居之所

清泉亭朗湖院

清泉亭府志在石井宋知錄汪伯輝始建  
裔孫知縣藻重建胡博士剛記 朗湖院  
府志在三十四都元至治間建

靈巖三洞東山九曲

靈巖三洞府志在縣西北百二十里中有

洞靈觀即通元觀觀東北曰慶雲洞巖竇皆五色兩巖流上有真人鸞鶴霞之像泝流秉燭入行可四五十步則芝田靈草羅列左右西曰蓮花洞入百步有大石室廣十丈刻石像高丈八尺旁有羽蓋幡節等像皆乳石所成又有天井深不可測南曰含虛洞洞有二重外隄內平有積雪臺沉香岑三洞皆襟帶浙嶺通聯率山山海經

以為三天子都山在率東豈謂是耶又有靈磨集仙魚龍張公垂鍾會仙合為九洞山有硯石色紫如肝瑩者可擬端大率燥慢多瑕 東山九曲府志亭在衝山宋邑士汪端雄建與朱晦翁王雙溪講道其間



新安大好紀麗

歙縣洪榜著

祁門

唐永泰初析黟縣之東浮梁之西置縣

赤嶺盧溪

府志赤嶺舊名血嶺在縣西一百里祥符  
經云昔人為梁取魚魚不得下遂夜飛越  
嶺而去人復張網於嶺上其飛不過者皆  
化為石遇雨則赤刺史馮宿改今名水流  
浮梁縣浮梁之名亦因此吳都賦所謂文

鯨夜飛而觸綸蓋此類也 盧溪府志出  
梅南山屈流三十七里合大共水

榨根山榔木嶺

榨根山府志在縣西七十里 榔木嶺在  
縣東五十里水分東西東入錢塘江三百  
六十灘西入彭蠡湖亦三百六十灘嶺雖  
平坦以水勢觀之則高矣

武陵嶺新安山

武陵嶺府志在縣西四十五里唐元和中  
縣令路旻鑿為盤道至今便之 新安山  
府志在縣西一百一十里一郡之勝在隋  
屬黟縣郡名新安因名

東松庵白楊院

東松庵府志在十四都當官道之衝而邸  
舍遼遠暮行者患之宋熙寧間悟法寺僧  
子珣為廬舍以給往來士大夫多為詩美



之宋元豐中王荆公以江西提刑踰此賦  
詩刻菴中丞相汪伯彥以布衣去鄉里及  
為少傅仗節歸亦有詩紹興初太師岳武  
穆王提兵討楊么過此題記壁間子珣號  
濟了堂淳梁朱氏子以試經得度晚益精  
進說法華滿一二萬遍蓮花生座下年八  
十一白楊院府志在十二都宋元祐二  
年建建炎間朝散郎胡俊傑請賜今額有

五景曰松蘿閣竹間亭碧波亭般若池四  
宜亭

歸來館不老山

府志方秋崖致政歸名堂宇曰歸來館又  
謂歸歲之所曰繭窩有繭窩賦不老山  
府志在縣北二十五里山出方竹昔有彭  
公修煉其巔能役鬼神有金液池丹泉亭  
彭公尖

松樹潭青蘿院

松樹潭在縣南晏公廟下深不可測 青  
蘿院在邑東五里青蘿巖下唐大曆二年  
建上有七級浮屠下有滴泉門前立辟支  
佛舍利塔六字碑宋大觀中僧道清私榜  
禪院

新安大好紀麗

歙縣洪榜著

歙縣秦縣

五硯二礫

輿地志曰歙縣南有五硯二礫兩邊皆壇  
石中間有溝裁五尺許水甚懸迅礫立厯  
硯下根反見初學記 二礫見上

墨嶺碧山

墨嶺府志在縣南十六里嶺產石墨土人



採之以畫久而成井號石墨井 碧山在  
縣西北八里其北與石盂山相接南面靄  
峯為黔之主山

潯陽臺橫江水

府志釣臺在縣南十八里亦曰潯陽臺相  
傳李白遊新安嘗釣於此 橫江水府志  
出武亭山東南流二十八里合章水入魚  
亭山口

聖母池三姑磨

府志在東嶽廟後山有聖母祠前有池泉  
白如玉相傳民有匿物相誣者各執楮錢  
密禱於神實者沈虛者浮舊掘得石刻云  
鑿物是非多老識別人真偽有池靈今尚  
置湫中 三姑磨府志一名吉陽山在縣  
東北十五里其山三峯輿地志云山多石  
三年一遇野火自然燒盡故老相傳號三

姑磨云若非磨年百姓放火輒有雨中峯  
有瀑布泉新安記云天將雨有鼓角聲見  
初學記

新安大好紀麗

歙縣洪楠著

績溪

梁析歙華陽鎮置縣  
良安唐永泰置今縣

巧溪常水

府志龍窠下有寨呼叢山關下有巧溪

常水府志出黃蘗山南流五十里合揚之

水入歙縣界

石照屏風

石照府志在縣東五里有石壁立方廣二



丈光可鑑物故以名山有白水泉又有石  
照院相傳黃巢過此照見猴形縱火焚之  
不晦宋蘇轍有詩東山石照為華陽四景  
之一 屏風府志山在縣北五十五里方  
廣端麗木石奇勝若畫屏然故名

大葵山靈鷲寺

大葵山府志在縣北六十里前踞潭水山  
半有巖舊傳有劉叟隱此中有菜如玉叟

嘗食之後仙去人呼為劉隱菜又呼為仙  
人巖巖下有白龍潭 靈鷲寺府志舊名  
幽山院在新榮鄉宋治平元年改名靈鷲  
寺

蒼龍洞翠眉亭

蒼龍洞府志一名蒼龍塢在縣北二十里  
洞口有石高數十丈下有潭深莫測俗傳  
龍藏於中因名中有十景曰瀑布泉水簾

洞飛仙橋石頭門觀稼軒逸老莊有四亭  
列華陽景。府志翠眉嶺在縣西兩山抵  
平橫列左右如眉舊有翠眉亭宋縣令蘇  
轍常吟詠其上因以慕其鄉





